



Eich cyf:
Ein cyf: MA/JJ/3967/21

Elin Jones AC
Llywydd
Senedd Cymru
Bae Caerdydd
CF99 1NA

23 Tachwedd 2021

Annwyl Lywydd

Gorchymyn Gweithdrefn Ddatblygu (Ymgylchoreion) (Cymru) (Diwygiadau Amrywiol) (Diwygio) 2021

Yn unol ag adran 11A(4) o Ddeddf Offerynnau Statudol 1946 (fel y'i mewnosodwyd gan Atodlen 10 paragraff 3 o Ddeddf Llywodraeth Cymru 2006), rwy'n eich hysbysu bod yr offeryn statudol y cyfeirir ato uchod yn dod i rym lai na 21 diwrnod o ddyddiad ei osod. Mae copi o'r offeryn a'r Memorandwm Esboniadol sy'n cyd-fynd ag ef ynghlwm er gwybodaeth ichi.

Mae Gorchymyn Gweithdrefn Ddatblygu (Ymgylchoreion) (Cymru) (Diwygiadau Amrywiol) 2021 yn cynnwys darpariaethau y bwriedir iddynt gefnogi'r gwaith o weithredu fframwaith polisi cynllunio newydd ar gyfer datblygu mewn ardaloedd lle mae perygl o lifogydd ac erydu arfordirol. Roedd y Nodyn Cyngor Technegol (TAN) 15 newydd a'r Map Llifogydd ar gyfer Cynllunio i fod i gael eu cyhoeddi ar 1 Rhagfyr. Roedd y fframwaith newydd hwn yn golygu bod angen newid technegol i'r darpariaethau deddfwriaethol sy'n sicrhau yr ymgynghorir â Chyfoeth Naturiol Cymru (CNC), prif gynghorydd y Llywodraeth ar faterion sy'n ymwneud â'r amgylchedd ac adnoddau naturiol, diwydiant a'r sector cyhoeddus ehangach, ar geisiadau cynllunio lle y gall fod yn berthnasol ystyried perygl llifogydd.

Ar 25 Hydref llofnodais Orchymyn a fyddai'n sicrhau parhad mewn perthynas â'r mathau o geisiadau cynllunio a fyddai'n destun ymgynghori ag CNC, yn ogystal â chreu gofynion newydd i ymgynghori ag Awdurdodau Tân ac Achub¹.

Ers i'r Gorchymyn gael ei osod, mae Llywodraeth Cymru wedi derbyn gohebiaeth a chyfathrebiadau gan awdurdodau lleol, yn lleisio pryderon dilys a rhesymol ynghylch y

¹ Nid effeithir ar y darpariaethau sy'n ymwneud ag Awdurdodau Tân ac Achub yng Ngorchymyn Gweithdrefn Ddatblygu (Ymgylchoreion) (Cymru) (Diwygiadau Amrywiol) 2021 gan y digwyddiadau diweddar, ac nid ydynt yn ddarostyngedig i'r diwygiadau a drafodir yn y llythyr hwn.

trefniadau i TAN 15 a'r Map Llifogydd ar gyfer Cynllunio ddod i rym ar 1 Rhagfyr. Roedd y rhain wedi bod yn destun 'lansiad anffurfiol' a oedd yn para am naw wythnos, yn dilyn eu rhyddhau'n anffurfiol i randdeiliaid ar 29 Medi. Roedd y cyfnod o naw wythnos yn caniatáu pontio rhwng fframweithiau polisi cyfredol a rhai newydd, i gydnabod y byddai llawer o geisiadau cynllunio wedi cael eu gwneud ar sail y fframwaith polisi presennol, h.y. fersiwn 2004 o TAN 15 a'r Map Cyngor Datblygu. Roeddem yn disgwyl y gellid bod wedi penderfynu ynghylch y rhan fwyaf o geisiadau cynllunio a gyflwynwyd eisoes, ac a oedd yn y system, erbyn 30 Tachwedd, ac felly ni fyddai modd i'r cyngor polisi newydd effeithio'n anfwriadol arnynt.

Mae awdurdodau lleol a'r diwydiant datblygu wedi dangos nad yw'r cyfnod pontio o naw wythnos wedi bod yn ddigonol at ddibenion galluogi trosglwyddo i'r fframwaith polisi newydd mewn modd trefnus. Ymhlith y mathau o gynlluniau y gallai'r TAN 15 newydd, sy'n dod i rym ar 1 Rhagfyr, gael effaith andwyol arnynt mae cynlluniau amddiffyn rhag llifogydd, sydd â'r nod o sicrhau bod cymunedau'n gallu gwrthsefyll llifogydd yn well. Pryder arall a leisiwyd gan awdurdodau lleol yn benodol yw eu bod yn teimlo nad ydynt wedi cael y cyfle i gyfrannu tystiolaeth a gwybodaeth leol yn llawn at y Map Llifogydd Cenedlaethol ar gyfer Cynllunio. Yn wahanol i'r Map Cyngor Datblygu blaenorol, mae'r Map Llifogydd ar gyfer Cynllunio yn cynnwys amcanestyniadau ar gyfer newid yn yr hinsawdd, gan arwain at barthau llifogydd mwy o lawer mewn rhai ardaloedd. Bydd oedi wrth gyhoeddi TAN 15 a'r Map Llifogydd ar gyfer Cynllunio yn caniatáu mireinio'r gwaith mapio a nodi strategaethau addasu priodol ar gyfer newid yn yr hinsawdd.

Mae'r oedi wrth wneud TAN 15 a'r Map Llifogydd ar gyfer Cynllunio yn weithredol wedi golygu y bu'n rhaid hepgor darpariaethau sy'n ymwneud â Chyfoeth Naturiol Cymru a datblygu a pherygl llifogydd o Orchymyn Gweithdrefn Ddatblygu (Ymgynghoreion) (Cymru) (Diwygiadau Amrywiol) 2021. I wneud hynny, byddaf yn gosod Gorchymyn Gweithdrefn Ddatblygu (Ymgynghoreion) (Cymru) (Diwygiadau Amrywiol) (Diwygio) 2021, i ddod i rym ar 25 Tachwedd 2021.

Rwy'n anfon copi o'r llythyr hwn at y Gweinidog Materion Gwledig, Gogledd Cymru a'r Trefnydd; Huw Irranca-Davies AS, Cadeirydd y Pwyllgor Deddfwriaeth, Cyfiawnder a'r Cyfansoddiad; Siwan Davies, Cyfarwyddwr Busnes y Senedd; Sian Wilkins, Pennaeth Gwasanaethau'r Siambr a Phwyllgorau a Julian Luke, Pennaeth Gwasanaeth y Pwyllgorau Polisi a Deddfwriaeth.

Yn gywir



Julie James AS

Y Gweinidog Newid Hinsawdd